

夢

林

玄

解

夢林玄解卷之三十二

夢徵

形貌部一

身體齒舌

頭額鬚毛

眉髮手足

面口背腹

腸胃

○○○身體類

○身長十丈

秦

秦王子嬰常寢于望夷宮。夢有人身長十丈。髻髮絕偉。納王舄而乘丹車。駕朱馬。至宮門。云欲見秦王嬰。闢者許進焉。謂嬰曰。予天使也。從沙丘來。天下將亂。當有誅暴者。

○以筆畫身

齊

齊世祖肅年十三。夢人以筆畫身。左右為兩翅。後踐大位。

又嘗夢體生毛髮長至足。

○身死墜床

唐

高祖神堯皇帝將舉義師西入長安。忽夜夢身死墜床下。爲群蛆所食。及覺甚惡之。乃詣智滿禪師而密語之。滿卽賀曰。公得天下矣。帝大驚曰。何謂滿曰。死是斃也。墜于床是下也。群蛆共食者是億兆趨附也。人不敢直指天子。故曰陛下。是至尊之象也。甚吉。後卽帝位。乃命滿營其寺。賜額爲興義寺。今寺內見有圓夢堂。及塑師像在後。

○裸身稱寃

明

萬太守信。宣德間治開封。夜夢一男子。裸身稱寃。自言爲

祥符氏耿羊兒所殺屍埋莊後信驚悟。明日至羊兒家考驗服罪。人皆異之。

○○○頭額類

○頭生角

蜀漢

諸葛亮出北谷口。魏延爲前鋒。延夢頭生角。以問占夢趙直。直詐曰。麒麟有角而不用。此不戰而自附之象。退而告人曰。角之爲字。刀下用也。頭上用刀。其凶甚矣。果爲楊儀所殺。

○筆點額

齊

高洋封齊王。夢人以筆點已額。以告王曇首。曰。吾其退乎。

哲拜賀曰。王上加點主字也。後受魏禪。

○斬頭持去 齊

高澄敗歷素見令望。其妃鄭氏夢人斬澄頭持去。惡之數日後。田子禮等劫澄爲主。澄不從。遂遇害。

○斷頭 齊

爾朱世隆夢人斷其頭持去。竟以語妻奚氏。意殊不適。未幾見殺。

○砍落頭 宋

劉沆累舉不第。天聖中。將辦裝赴省試。一夕夢被人砍落頭。心甚惡之。有鄉人解之曰。狀元不到十二郎做。只得第。

二公因詰之曰。砍却頭。留項在裏。蓋南音謂項爲沆。留劉同音。後果第二名。

○兩易其頭

宋

岳某蜀遂寧府人。李某開州人。各祈夢于七曲山梓潼帝君之祠。二人素不相識。然所祈皆功名之事。岳夢至一宮殿。見一王者冠冕坐于殿上。侍御七八人。傍有持簿者。岳直前問曰。某前程如何。未幾。又見李至前。亦以前程叩之。扶簿者閱覽姓名畢。上言于王者之前。忽一人下殿。傳旨曰。汝二人皆可貴。但身與頭不相稱。必須兩易其頭。岳聞之驚恐。其人曰。汝畏換頭。無復貴矣。言畢。忽有一人手持

斧鉞引岳至廊廡之下。二人又引李至。使二人瞑目而立。竟易其頭。夢醒。頸間尚有微痛。早起。僕見其面不似怪之。然其聲不改。且歷言昨者祈夢之故。及歸。妻子各駭然。問平日家庭之事。應對皆無舛。遂傳說夢中換頭之由。妻子之心稍安。其年領鄉薦。明年登科。岳調重慶府江源縣主簿。李亦登科。得簿尉之缺。既歸。李丁憂。岳之任將滿。李服除。再調。亦得江源主簿。與岳爲代。二人雖同時祈夢。然各宿不相會面。以交代始得相識。岳之妻子驚曰。李之面。岳前日之面也。李之妻子亦驚曰。岳之面。李前日之面也。飲酒極歡。相與言前日之夢。各大驚悟。後官俱顯。蜀人以爲

美談。

○易頭 宋

賈弼夢人易其頭。還能半面啼。半面咲。

○三人頭有血 明

高祖嘗夢三人頭有血。以土傳之。以爲不祥。欲刑人以應之。劉誠意基適入見。高祖語之夢。基曰。是衆字。頭上有血。以土傳之。得土得衆之象也。應在得夢時三日。當有報至。高祖乃留所欲刑人。至三日後。海寧以城降報至。高祖大喜。悉以所留人命基縱之。

○頭上生羊角 明

解學士縉字大紳江西吉水人。會試時適有廬陵舉人沈舉發解南省居首。及將廷試忽夢頭上生羊角。同年曰頭角崢嶸在此舉矣。傍一人曰非也。羊角乃解字也。恐有解姓者復居首耶。迨傳臚果得解縉也。縉才氣豪邁遇事敢言。後謫交趾叅議卒于官云。

○額有數獸頭

明

陳憲副宣之爲進士時數夢額上有類屋角獸頭之狀。旣而除御史獸頭乃豸冠也。

○○○眉髮類

○眉長如髮

虞

舜二十。夢睂長。與髮等。堯乃命舜代已攝政。

○皓髮長身 宋

岳真人母。一日。夢老人皓髮長身。冠劔莊偉。告之曰。我今當寄母家矣。明日。州人見有青氣西北起。自天而下。奔往視之。止于岳家。乃生。自幼不嗜酒肉。至元中。封崇元廣化真人。丞相安童病。真人視之。卽愈。大德初。升仙而去。

○披髮爲厲 明

刑部侍郎張昺。出掌北平布政司事。爲文皇所縛。不屈死之。文皇嘗夢昺披髮爲厲。出焚其尸。面色如生。

○○○面目類

○目洗河西

夏

伯禹夢目洗於河西。四岳舉之。舜進之。堯堯命以爲司空。

○面目盡血

唐

渾瑊懼西蕃劫盟。掌書記韓弇遇害。弇素與櫟陽尉李績友善。績因晝寢。忽夢弇被髮披衣。面目盡血。績初不識。及稱姓名。乃相勞勉如平生。弇曰。今從禿髮大使填河。憔悴困辱不可言。間來奉詣耳。吾久飢渴。明日午時。于宅西南爲置酒饌錢物。亦平生之分也。績許之。悲愴待旦。至午時。如言祭之。忽有黑風自西來。旋轉筵上。飄卷紙錢及酒食。皆飛去。舉邑人觀之。時眞元四年。

○○○口鼻類

○入口落腹

齊

陶繼之爲秣陵令。追捕劫財李龍等。因枉殺太常伎經月餘。陶夢伎來至案前云。昔枉見殺。實所不忿。訴天得理。今故取君。便跳入陶口。乃落腹中。陶驚寤。俄而倒伏。頭乃著背。四日而亡。

○唾灼口中

齊

鄭灼幼受業于皇侃。一夕夢遇侃于塗。侃謂灼曰。鄭郎開口。侃因唾灼口中。自後義理逾進。

○籃中擇鼻

宋

徐郎中夢神人携一竹籃。其中皆人鼻。視徐曰。形体不薄。但鼻曲而小。剗之。乃于籃中擇一鼻安之。神笑曰。好一正郎鼻也。徐鼻自爾端直。歷官正郎。

○○○齒舌類

○以劍斷其舌

梁

沈約夢齊和以劍斷其舌。乃呼道士奏赤章于天。稱代禪之事不繇已。梁帝聞之怒。遣使譴責。約懼遂卒。帝以懷情不盡。謚之曰隱。

○舌上生毛

宋

馬亮知江陵府。當代夢舌上生毛。僧曰。舌上生毛。剗不得。

當再任果然。

○剪舌

宋

王朝郎夔州道士也。舌長呼字不正。忽夢老君剪舌。既覺語遂正。

○齒長數尺

明

滕憲長佐字良輔。臨洮之蘭縣人。嘗謂予曰。某爲御史時。嘗夢口齒忽長數尺。俄遷副使。昨又夢頭長數尺。不知何故。占者曰。齒長當主衙門大。頭長當得大冠。俄而遷四川按察使。蓋衙卽牙。冠卽官。故也。

○○○鬚毛類

○鬚化青龍

蜀漢

雲長公有鬚一莖。美長而色青。婉轉生動。忽夢此鬚化青龍飛去。覺而失之。自是力減。

○陰毛拂踝

齊

酈範解青州刺史還京。夜夢陰毛拂踝。他日言之。齊人史武進解曰。使君必當重牧全齊。再祿營丘。範笑曰。吾當爲卿驗此夢。後果如其言。

○多鬚丈夫

唐

李林甫作相。嘗夢一白晣多鬚長丈夫。逼已排之。不能去。既寤。言曰。此形狀類裴寬。寬謀代我故也。時寬爲戶部尚

書。兼御史大夫。乃因李迪之黨斥逐之。是時楊國忠始爲金吾胄曹參軍。不十年。林甫卒。國忠竟代其任。其形狀亦類寬焉。

○被剝盡

宋

李迪美髭髯。未御試前一夕。夢被一人剝削俱盡。迪甚惡之。有解者曰。秀才當作狀元。緣今歲省元是劉滋。今替滋矣。果狀元及第。

○○○手足類

○手熱

齊

張敬兒爲南陽守時。妻嘗夢一手熱如火。爲雍州。夢一股

熱爲開封。夢半身熱。敬兒意欲無限。謂人曰。吾妻將夢通身熱矣。齊主惡殺之。

○手執炬火

梁

李元忠夢手執炬火。入其父墓中。驚起。旦告其師。師占曰。大吉。此謂光照先人。後元忠名位果大顯于北齊。

○割落指節

北齊

莊帝欲圖爾朱榮。夢手持一刀。自割落十指節。都不覺痛。惡之。後帝于明光殿。榮入見。魯安等持刀入。卽馳向御前。帝拔千牛刀。手刃之。去其十指。

○無左手

北齊

帝未貴時。舟泊江干。夢無左手。惡其不祥。且登岼入艸庵。爲老僧言之。僧賀曰。無左手者。獨拳也。主爲天子。後帝興建此庵爲吉祥寺。

○拊掌而咲唐

韓文公少時。夢人與丹篆一卷。強吞之。一人在傍拊掌而咲。後覺。如有物梗胸中。後見孟郊。乃夢中傍咲者。

○以足躡之宋

張興頗信佛法。常從沙門僧融翼。時受八戒。興爲劫賊所引。逋逃不獲。妻繫獄掠笞積日。偶縣失火。出囚路側。遇融翼。妻呼閤黎。何不救我。融曰。貧道力弱不能救。唯宜勤念。

觀世音。庶獲免耳。妻便晝夜祈念。經十日許。夢一沙門。以足躡之。曰。咄咄可起。妻卽驚起。鉗鎖桎梏皆脫。然閉戶警防。無繇得出。乃却自械。又夢向者沙門。曰。戶已開矣。妻覺而馳出。守備俱寢。安步而逸。闇行數里。卒值一人。懼躡地。已而相訊。乃其夫也。相見悲喜。夜投融翼。翼匿之。獲免焉。

○手拍項背 明

項孔恂。浙江處州麗水人。齋戒沐浴。欲明旦往城隍廟祈籤。當夜五鼓。夢出監外西號門。見一老者。長鬚皤然。以手拍項之背。曰。吾偕子應天府前看榜。至則果見懸榜。指云。你名列在三十二。言訖不見。項又爲同郡友看。名列第十

六。遂覺與王相識之。是秋二人同在監。應京闈鄉試。及揭曉。項中九十一。王中八十三名。未解其意。後檢小錄。項詩經中第三十二卷。王易經中第一十六卷。果符前夢名數也。

○○○背腹類

○鞭背

宋

寶祐間。陳統制在城隍廟。夢數卒押王都統至庭下。鞭背。覺以語王。王怒叱之。未半年。王疽發于背。數日始愈。

○腹中五色蛇

明

彭郎中彥克。江西安福人。會試先數夕。嘗夢腹中有五色。

蛇出。其長幾丈許。文彩爛然。是年中第四名。刊行春秋義一篇。策一道。蓋五色。乃文章象也。

○○○腸胃類

○腸出繞閭門

東漢

孫鍾。富春人也。幼失父。事母至孝。遭歲荒。以種瓜爲業。瓜熟。常以設行者。家事福德神甚虔。瓜熟未獻神。不以設也。忽有三少年詣鍾求瓜。鍾曰。吾未獻神。子姑坐。卽起入獻神。引少年入。設瓜及飯。飯訖。三人謂曰。我蒙君厚恩。今示子墓地。墓之後。子孫世世貴不可言。遂令鍾下山百許步。勿返顧。見我止。卽墓地也。鍾去不六十餘步。便返顧。見三

人化為鶴飛去。鍾記之。遂二。此蓋其後鍾之妻孕夢腸出繞吳閭門以告隣母。曰。安知非吉祥。遂生堅。堅生權。五世皆王于吳。

○出腸胃 西晉

沙門竺法義病篤。晝眠。夢一道人來治其病。刺出腸胃。湧洗臟腑。見有結聚不淨物甚多。洗濯畢。還納之。語義曰。汝病已除。夢覺眾患豁然。尋得復常。

政事部

科第
祭享

官祿
恩賜

壽算
酬酢

婚姻
囑託

喪葬

○○○科第類

○四舉成名

唐

竇盧署本名輔真。貞元六年舉進士不第。將遊信安謁郡守鄭式瞻。甚禮之。館給數日稍狎。因謂署曰。子復姓不宜兩字爲名。將爲改之。何如。署因起謝。且求其所改式瞻書數字。若著者助者。署者曰。子可自擇之。其夕宿于館。夢一老人謂曰。聞使君與子更名。子當四舉成名。四者甚佳。後二十年爲此郡。因指郡隙地曰。此可以建亭臺。旣寤思之。四者署字也。遂以爲名。旣三年又下第。以爲夢無徵。知者或心笑之。後二年果登第。蓋自更名後四舉也。太和元年署自秘書少監爲衢州刺史。旣至。周覽郡內。得夢中所指隙地。遂構一亭其上。名曰徵夢亭。

○來年狀元

宋

雋宗遠在海州書表司嘗夢有告者曰。來年狀元是王堯臣。宗遠用題司房之地壁。是年秋試開封府解榜到。見王之姓名。謂同列曰。此是明年狀元也。洎南省榜出。又見王預奏姓名。宗遠愈喜。應題于壁。未幾。王果魁多士。

○五子科第

宋

宣和中。方臘犯諸暨。其士人黃汝楫。以財物一萬緡贖賊。所掠士女千人。夜夢神告曰。上帝以汝活人多。賜五子科第。其後子開閣。閱閱闈。皆登第焉。

○報狀元榜

宋

祝染沙縣人也。遇歉歲爲粥以施貧者。後生一子。聰慧請
舉入學。手榜將開。忽街上人夢捷者奔馳而過。報狀元榜。
手持一大旗。書四字曰施粥之報。及榜開。其子果爲特科
狀元。

○呼解元

明

姚文敏公夔。字大章。浙之桐廬人。鄉試時。嘗與商公輅同
舟。夜夢一吏持方簡一片來舟所。連呼解元者二。簡上有
商輅二字。公曰。吾中否。其吏轉過簡後視之。又有姚夔二
字。寤而共語曰。焉有一科兩解元耶。此不足信。迨揭曉。商
公是科第一。姚公後科第一。由進士累官至太子少保。吏

部尚書

○汝子登科之年 明

卓太守天錫福之興化人。始生時其父夢人告曰：汝對門王老者死之日，乃汝子登科之年。覺而識之於冊。後景泰癸酉正月，王老物故。是歲適當大比之年，卓果中解元。

○明日狀元 明

孫翰林賢，河南杞縣人。赴京會試，偕同省舉子四人同至一驛。其驛丞待之甚厚，心頗疑之。明年孫下第，仍過其驛。而驛丞稍有慢意，因問其故。丞曰：疇昔之夜，嘗夢有人告曰：明日狀元到此。黠旦惟公等至，故不敢慢耳。孫默然。後

舉廷試果狀元及第。

○汝第十名 明

金石浙人。鄉試畢夢有人來其家報云。石塘中第二名。汝中第十名。迨榜出布政司門外。從前張掛。纔露見第二名。石塘金在後。斗曰。我中在第十名。既而果然。人問何以知之。金具言其夢。

○三塲之兆 明

王黃門徽字尚文。南京錦衣衛人。景泰丙子科。鄉試前二夕。夢登高梯三次。至第三次墜梯而下。自謂此必三塲之兆。既而領鄉薦。連中會試。尋聞母訃。不與廷試。始悟墜梯

之夢。又嘗夢入試院。見試官排定舉子名數。分爲三甲。第一甲一十五名。第二甲第二名。乃友人江陰顏瑄。第三名卽公也。迨揭曉。中一十八名。廷試名在二甲第三。兩度皆奇驗。後顏亦中丙戌進士。名果在二甲第二。公職司言路。累上封章。犯顏敢諫。不避權幸。有古諫臣風。陞陝西叅議。養高林下。閉門不出。士大夫咸仰望其丰采云。

○登第狀元前

明

松江張進士黼。未第時。嘗夢人謂曰。汝登第在狀元前。覺而思之。世豈有科名先狀元者。吾殆無此望矣。及丁未會試。名在十五。鉛山費學士宏。名在十六。是科宏狀元及第。

計得夢時費尚未生也。

○○○官祿類

○君尹吾邑

唐

鍾離介寓長安夢二女揖之曰。吾家孟溪君。今中第。尹吾邑矣。已而果如其言。介既至仙居。求其跡。廟而祀之。名曰慈感。

○君得五品

唐

戴胄素與沈裕善。胄死。裕在州。夢胄着故敝衣。顏容甚頓。見裕悲喜。裕問公生平修福。今者何爲。答曰。吾昔誤奏殺人。吾死後。他人殺羊祭我。由此二事。辨答辛苦。不可具言。

今亦了矣。因謂裕曰。吾平生與君友善。竟不能進君官位。深恨于懷。君今日得五品。文書已過天曹。相助欣慶。故以相報。言畢而寤。九年春。裕將歸江南。行至徐州。奉詔書授裕五品。爲婺州治中。

○河南尹 唐

王潘以元和五年登科。嘗夢爲河南尹。平旦視事。有二客來謁。一衣紫而東坐。一衣緋而西坐。緋者謂紫者曰。崙邦如何處置。曰。已科決遞出。盼訖。覺乃書于誥牒。之後別紙上。後二十年。果除河南尹。旣至三日。留守大將知水。一院官與分司郎官偕至門答。一如夢中。潘遽命開篋。取官誥。

所誌者以視客。乃郎官家奴竊遁送出縣。縣斷如此。

○十年作襄州刺史

唐

高元裕於太和三年任司勳員外郎。寓宿南宮。晝夢有人告曰。十年作襄州刺史。既寤私異之。因援毫以隱語記于廳之東楹。掩暎處曰。太三寤襄刺十年。洎開成三年。爲御史中丞。遂爲夢因虛耳。是後出入中外。數歷貴位。至大中二年。由天官尚書授鉞漢南。自題記後。解署補葺亦屢矣。且謂楹上字無復存也。及與好奇士同往觀之。則毫翰煥然獨存。高因屈指以今之年加曩之十。乃二十年矣。

○于位正郎

宋

查道夢神人謂曰子位至正郎壽五十七後官至右司郎中享年六十四人以爲寬厚仁孝所延云。

○鼓吹送狀元

宋

馮商鄂州江夏人壯歲無子將如卒師其妻授以曰金數斛曰君未有子可以此爲買妾之資及至京師買一妾償鈔矣問妾所自涕泣不肯言固問之乃曰吾父居官因網運欠拆鬻妾以爲陪償之計商遂惻然不忍犯遣還其父不索其錢及歸家妻問置妾安在具告以故妻曰君用心如此陰德厚矣何患無子居數月妻有娠將誕里人皆夢鼓吹喧聞送狀元入馮家次早生子卽京也後領舉爲解

元省試爲省元。登第爲狀元。世號爲馮三元。後官宣徽南院使。拜太子太師。致仕卒。贈司徒。

○十八歲尚書

明

李宗伯本。字立之。蜀之富順人。正統戊辰。赴京會試。道經河西務。有某姓者。先夜夢人報云。明日十八歲尚書至。須禮遇之。翼日。某張筵以待。無他客詣門。夜二鼓盡。舉家不寐。尚張燈俟之。始有一人叩門投館。延之甚恭。且問其姓名。公曰。蜀之富順會試舉人李本也。某遂以前夢白之。李喜。後果登第。授翰林檢討。累官至南京禮部尚書。蓋姓名二字。皆含十八字意。始知所夢十八歲者也。

○明日尚書至 明

滕司馬自浙江奉使至閩。其驛卒夜夢。明日有尚書至。時公爲副都御史奉勅考官。明日果至。後還朝數年。轉兵部侍郎。正二品俸。致仕。亦尚書職也。

○爲叅政 明

陸大叅。字孟昭。蘇州常熟人。少爲庠生。時好遊山水。頗廢學。其妻憂之。一夕夢白頭老父語之曰。汝無憂也。彼後當爲叅政。仕宦非小。婦歸告其母。母亦不知叅政何官。因問其父。父曰。此三品官也。陸後果中進士。歷官刑部郎中。然倜儻好事。喜交結。公卿大夫咸欲薦之於朝。當道疑之。

竟不敢用陞福建巡海叅政卒

○舊有會元明

程編脩楷字正之江西樂平人嘗夢本縣神人告曰此地舊有會元今逾二百四十年矣子當爲第二人後果中丁未會元程以郡志考之宋朝本縣有馬廷鸞者丁未科嘗爲會元至成化丁未適二百四十年

○○○壽算類

○增汝壽西漢

孫泰山陽人姨以二女爲托曰其長女損一目汝可娶其女弟娛卒泰娶其姊或詰之泰曰其人有廢疾非泰何適

衆皆服其義。嘗于都市買鐵燈臺磨洗之。卽銀也。泰往還之。他日泰夢一神人。紫衣象簡。從容謂之曰。汝平生德行不虧。名知天府。奉帝命宜增汝壽。而昌汝後也。汝宜勉之。泰自是愈脩陰德。壽九十七而終。子孫世爲顯宦。

○福壽雙全

西漢

陳泊爲開封功曹。時章獻太后臨朝。族人杖殺一卒。泊當驗屍。爲卒伸其冤。雖忤旨。太后亦不罪。後泊夢卒告云。陰司以公爲政公忠。已注公富貴榮顯。福壽雙全。及與公賢子孫。我受公恩。故來相報。泊自此顯名。歷官臺省。子孫皆以詞學顯仕。

○壽增三紀

東晉

徐宗仁。西蜀人。其鄉有兩石橋。夾出一江。四時皆湍急。下則深淵。惟此處可以立渡。常年溺死者甚衆。蓋船小觸石卽碎。宗仁發心造一巨舟。兩頭裹以鐵葉。自顧篙手。專一渡送往來之人。且建善緣。以薦亡者。一日忽有道人登門。稱善星命。謂徐曰。公壽止三十三。徐大驚異。其年生日之時。夢至官府。見王坐于堂上。門首濕衣之鬼。三四人執一卷投于王前云。徐宗仁濟生拔死。功德莫大。乞與夫婦壽考。子孫榮貴。王者指左右。以此辭示宗仁曰。君壽本當盡。爲此之故。壽延三紀。覺而異之。自此益好善樂施。子孫

皆榮顯宗仁果逾三紀而卒。八立祠于渡卒。

○壽六十四

宋

陳希亮夢異人按圖告其壽止六十四後果應。

○注公高壽

宋

蔡襄未仕時每喜食鵝。一夕夢一老人曰來日當被害。願公貸命。襄問汝何人。乃誦詩云食君數粒粟充君羹中肉。一羹斷數命。下筯猶未足口腹須臾間禍福相倚伏。願君戒勿殺死生如轉轂。覺而異之。詢于厨中有黃鵝數十。放之。經夕復夢褐衣老人云感公從禱已獲復生。今上帝已命注公高壽矣。其後登進士。歷官至端明殿大學士卒。

贈吏部侍郎孫佃廷試唱名第一。

○不至上壽

宋

治平中，顏賓寓京師，夢入三清殿上，老子高二三尺，狀甚異。謂蘇曰：子知楊綰事乎？答曰：唐之賢相也。子知高郢嚴震乎？曰：郢文臣，震功臣也。三人孰勝？曰：郢震不如綰遠矣。曰：三人皆終尚書僕射，然綰不至上壽，郢震並享耆年，子知其說乎？曰：不知。曰：綰好殺生，而郢震皆不殺，此所以壽異也。子其志之，遂覺。

○必獲福壽

宋

曾公亮字明仲，泉州晉江人。未顯時，嘗夢人謂公有陰德。

必獲福壽。後登相位。年八十卒。子孝寬。官至吏部尚書。竟如其言。

○壽延百歲 宋

李謙嘗至歲歉。出粟千石。以貸鄉人。明年又歉。人無以償。謙卽對衆焚券。曰。債已償矣。明年又大歉。竭家資煮粥以濟之。動以萬計。死者復爲瘞之。一日寐夢一紫衣人告之曰。上帝知汝有德及人。壽延百歲。言訖而去。後謙果百歲而終。子孫皆貴顯。

○非久人間 宋

黃思至京。夢人告曰。子非久人間。上帝有命。典司文翰。覺

而書之。不逾月而卒。

○壽問孔老人

明

文溫州林將之任。祈壽于九仙廟。夢神曰。壽問孔老人。文既寤。殊不解。及蒞任。命工解板修官船。其督工老人姓孔。方解板。竟向文稟復。林心已訝之。乃問其數。孔云。板止五十七塊。又問之。曰。止此無餘矣。時文年五十七。聞言大驚。便覺背上有芒刺。不崇朝而疽發於背。卒。

○欲知壽數

明

解元唐先生寅中歲失意。禱神祈壽。神語之曰。欲知壽數。觀此軸首。唐視之。乃南呂二字。餘不憶。覺後亦不能解。後

至五十外。過友人家。見堂上一軸。似昔夢所觀。迫而察之。乃是一詞。首題云。南呂一枝花。唐駭而讀之。中二句云。生年半百。前路苦無多。唐心知非佳兆也。乃以女屬太學王先生。寵曰。唐生止此一女。以許君之子。幸善視之。吾據夢兆。且不久矣。未幾辭世。

○○○ 婚姻類

○ 刻日奉迎 東晉

咸寧中。韓劉王三子。同遊蔣侯廟。廟有美人像。三子醉。各指像戲相匹配。是夕。三人同夢。蔣侯遣傳教曰。家子女並醜陋。而猥垂榮。顧輒刻日奉迎。三子相問皆符。大懼。詣廟

謝罪乞哀無何俱夢蔣侯親來降已日君等既已顧之實貪會對尅顛垂及豈容中悔經少時並亡

○更生相就 東晉

武都太守李仲文在郡喪女權厝郡城北張世之代爲郡有男曰子長年二十在厠夢一女年可十六七自言前府君女不幸蚤亡今當更生故來相就明忽晝見衣服薰香殊絕遂爲夫妻衣皆有滫如處女焉後仲文遣婢視女墓因過世之婦相問入厠見此女履一隻在子長牀下取之啼泣疑人發其塚持歸示仲文仲父驚愕遣問世之世之呼問兒具陳本末李張俱爲可怪發棺視之女體已生肉

顏色如故。唯右脚有履。子長夢女曰。我比得生。今爲所發。自爾之後。遂死。肉爛不得生矣。萬恨之心。當復何言。遂泣別。

○配弄玉

唐

唐太和初。沈亞之嘗夢入秦主內史廖家。廖舉亞之。得見秦主。累有戰功。配以女弄玉。

○○○喪葬類

○死葬相及

西漢

范式字巨卿。與汝南張劭友善。一夕。式夢劭呼曰。巨卿。吾于某日死。某日葬。子能相及。式馳赴之。喪已發。柩不肯前。

母曰。劬有望耶。移時。式素車白馬。號泣而來。母曰。此必元伯也。劬至。痛哭。執紼而前。柩乃進。

○自稱求塋 西晉

鄒湛夢見一人。自稱蹠仲舒求塋。鄒悟曰。宅西有積土。敗瓦其中。必有死人。簡之果然。乃塋之。蓋蹠仲舒字。折之乃舍西土瓦中人也。

○祭享類

○祭余福女 春秋

晉趙嬰通于趙莊姬。原屏放諸齊。嬰曰。我在。故樂氏不作。我亡。吾二昆其憂哉。且人各有能有不能。舍我何害。弗聽。

嬰夢天使謂已祭余。余福女使問諸士。貞伯。貞伯曰。不識也。既而告其人曰。神福仁而禍淫。淫而無罰。福也。祭其得亡乎。祭之明日而亡。

○相奪予享

素

狄圍衛。衛遷于帝丘。卜曰。三百年。衛成公夢康叔曰。相奪予享。公命祀相。甯武子不可。曰。鬼神非其族類。不歆其祀。祀鄩何事。相之不享。于此久矣。非衛之罪也。不可以間成王。周公之命祀。請改祀命。

○孟享一事

宋

蒲咸臨于宣和癸卯冬夜宿荆山驛夢一老衣冠甚偉自

云是王安石探懷中數簡與之云宜先討寃孟享一事至紹興壬戌秋以繁江尉後有容殿香火官四時孟享實與行事始符夢焉

○享婦人之祭

明

黃巖林方伯一鶚居官時嘗于中元日夜夢享一婦人之祭覺而所享之物若在齒頰街坊屋舍宛然在目公怪之命一健卒指其所向物色之果于某坊得一老婦年七十餘喪其故夫所焚紙灰尚未寒問其祭物與夫死之年月日時以復于公其物乃公夢中所食而夫死之年月日時與公之生無不同者此亦異也

○○○恩讐類

○中死處

北魏

姚萇殺苻堅。夢堅將鬼兵數百。突入萇營。萇懼走入宮。宮人迎萇刺鬼。誤中萇。陰鬼爲語曰。正中死處。拔矛出血斗餘。寤而驚悸。遂患陰腫。醫刺之。出血如夢。遂死。

○終不相放

梁

李昭旣擒元樹。樹死。後昭奉使至潼關驛。夢元樹曰。我已訴天帝。待卿至隴。終不相放。及昭至隴口。爲賀拔岳所殺。子鵠尋爲達野拔所殺。

○明公雪冤

樊宗諒爲密州刺史。時屬邑有群盜。提兵入邑。昨殷氏家掠奪金帛。殺其父子。死者三人。刺史捕之。月餘不獲。有鉅鹿魏南華者。寓居齊魯間。家甚貧。宗諒命攝司法掾。一夕南華夢數人皆被髮列諒曰。姓殷氏。父子三人皆無罪而死。願明公雪其冤。南華曰。殺汝者爲誰。對曰。某所居東十里。有姓姚者。乃盜魁也。南華許諾。驚寤數日。宗諒謂南華曰。盜殺吾昨。且一月矣。莫窮其迹。豈非吏不奉職乎。爾爲法司官。第往驗之。南華馳往。忽見一狐起于路傍深艸中。馳入里人姚氏居。噪而逐者以百數。其狐入一穴中。南華命以錘發之。得金帛甚多。乃群盜劫殷氏財也。卽召姚氏

子訊其所自。姚目動詞詎。即收効之。果盜魁也。于是盡擒其支黨。且十輩。求狐卒無所見。殆冤魂之所托也。

○三年未報

唐

陳甲獵于東野。大藪。歛見大蛇。長六七丈。玄黃五色。卧岡下。甲射殺之。不敢說。三年後。至故見蛇處。語同行云。昔在此殺大蛇。其夜夢一人。烏衣黑幘。至其家曰。汝無狀殺我。我昔醉不識汝面。故三年未相報。今自來就死。欲安逃乎。其人驚覺。明旦腹痛而卒。

○讎雪

後漢

都押衙何群。倚勢凌物。毒殺孔目官宋柔。一夕。夢柔向群

大叱曰。吾讎雪矣。遂驚覺。無何。竟以謀叛。爲裨將竇思禮所殺。

○死當如我 宋

李全乞靈毛司徒廟。無應。全怒。斷神像左臂。或夢神告人云。李全傷我左臂。全死亦當如我。至其敗。果斷左臂而死焉。

○訴帝復讎 元

元入宋。臨安帝昀既降。封瀛國公。使爲僧。號合尊。有子完普。亦爲僧。俱坐說法聚衆。見役其舅有陘全翁。夢二僧曰。吾趙鼎也。被虜屠害。已訴諸上帝。可復讎矣。及韓山童倡。

言彌勒佛下生而中原之亂沸起元鼎竟遷趙鼎復仇庶
幾驗云。

○○○酬酢類

○十五事酬君 唐

楊國忠初名釗。未貴前寄居永興寺。寺僧慧曉與言。此寺
基爲漢侍中張建宅。晉明時。六代孫傑施爲寺。而建墓
在佛殿下。徃徃托夢言得名卿爲我作誌銘。令死不朽。足
以無恨。釗因戲言。各卿舍我其誰。于是爲作誌。并爲立碑
以表之。碑成之夕。釗忽夢緋袍金帶。貌類神人。揖釗而言
曰。感君表素美。舉過甚。思無以報。願以十五事酬君。語訖

而覺。後釗于天寶七年領度支郎中。兼侍御史。善迎上意。一歲領十五餘使人以爲張之報云。

○媿謝之意

唐

劉昌至平涼。刼盟之所。收聚亡歿將士骸骨。坎瘞之。因感夢於昌。有媿謝之意。昌上聞。德宗下詔。深自克責。遣秘書少監孔述霽及中使以御饌內造衣服數百襲。令昌收其骸骨。分爲大將三十人。將士百人。各具棺槨衣服。葬干涉水原。大將曰旌義塚。將士曰懷德塚。詔翰林學士撰銘志祭文。昌盛陳兵設幕次。具牢饌祭之。昌及大將皆素服臨之。焚其衣服紙錢。別立二石。題以塚名。諸道莫不感泣。

○○○囑託類

○僕居頽毀唐

唐韋建除武昌軍節度使將行夢一朱衣導從數十詣韋曰公將鎮鄂僕所居頽毀非公不能葺治韋寤而志之至鄂經宋無忌廟覩其像即夢中所見遂爲新之。

○莫管閒事宋

胡仲微赴省試有富家子倩之代筆許以重資爲謝胡却之夜夢黃衣卒報榜胡詢已之得失卒曰正爲公姓名在榜所以來報旣去復還曰秀才解名雖定然須莫管閒事乃可胡矍然覺因思畫之所囑力却之果預薦。

將毀吾居

宋

師鎮平江夜聞鼓笛喧問何處作樂老兵言後園
百花大王生日府民年例就廟獻送韓意謂非典祀行將
毀之兵馬都監夢有客人謁曰吾百花大王也久獲血食
府臣今府主將毀吾居願賜一言勸止都監醒寤旦詣府
稟曰尚書欲拆百花廟乎韓驚曰夜來有此念初不形言
君何知之具以夢告韓嘆其靈議遂寢

家屬爲託

元

葉子澄吳人貧而好義與縣達魯花赤伯顏交至正壬
辰寇起浙省調兵守昱嶺時伯顏没于王事其家在嘉興

崇德州訃至。家人招黃冠師追薦攝召之。顏云：旦夕杭城且危，爾輩速依吾弟處逃生。母妻以無弟，再扣之曰：松江葉子澄乃吾存日生死交也，可往依之。卽備船東行。比至，前三日葉夢伯顏相見，以家屬爲託。比伯顏家人至，葉卽留居供給不怠。後杭城果陷。

夢林玄解卷之三十二

終

夢林玄解

卷三十二

蜀記

三

夢觀

夢林玄解卷之三十三

夢徵

什物部

舟械 樂器

車輛 印笏

武械 家伙

幡幢 梳妝

祭器 南具

○○○舟械類

○乘船赴任

宋

蜀葉逢夢乘船赴任。江上候吏旁午迎入石窟。忽報勅下授水部簡較員外郎。後覆舟于特爲郡青衣灘而死。

○舟來載汝

明

楊王姓陳氏。世爲揚州人。爲善好施。鄉里有貧困者。輒周濟之。未嘗自以爲德也。宋季從大將張世傑。扈從祥興。帝

駐南海。元至元己卯春，與元軍戰，師敗多溺死。王所乘舟，下爲風破，幸及岨，與同伍累石支釜，煮遺糧以療飢。旣而食盡，聞觸髅山有死馬，欲往割烹之。王未及行，疲極而睡。夢一白衣人曰：「汝平生多陰騭，慎勿食馬肉。」今夜有舟來載汝也。王寐未之信，俄又睡。夢如初。時夜將半，夢中彷彿聞櫓聲，有衣紫衣者，以杖觸王之膝曰：「舟至矣。」奈何不起。王驚寤，身忽在舟上，見舊所屬統領官。時統領已降於元將，元將畏舟重，凡有來附舟者，輒擲棄水中。統領憐王，藏之艙版下，日取乾饌及漿，從版隙潛投飼之。居數日，元將知之，統領及王皆徬徨不自安。忽颶風風盤旋如轉輪，元將

大忠統領急告元將王有異術。白而延之。王仰天叩齒。俄而風濤恬息。元將喜。飲食王。復厚贈之。遂得還揚州。久之遷居於盱眙津里鎮。年九十九而終。次女歸。

仁祖淳皇帝。誕生。

太祖高皇帝及卽位。追尊。

淳皇后。追封王爲揚王。

○僚友並舟。

明

車方伯寧嘗夢與其僚友劉觀並舟。俱入廣中。俄又並舟而還。無幾車陞廣東右布政使。劉陞廣西右布政使。遂並舟而往。踰年劉卒。舟載寧喪。行至廣東河下。會車亦卒。正以其日發喪。於是又並舟而還。

○登舟

明

孫本京庠士人也。鄉試畢，夢與衆友北行登舟。內同學一人陶元素相牽而上。其年京庠中鄉榜者惟陶孫二人。

○○○車輛類

○乘車掛肉

東晉

易雄爲春陵令，爲王敦所虜。夢乘車掛肉，其傍寤而解曰：肉必有筋。筋者，斤也。車傍有斤，吾其斬乎？尋而敦遣殺之。

○黑憶繞車

東晉

陸機爲成都王穎參軍，爲孟玖所譖，將見收。機夢黑憶繞車，手決不開。及穎遣牽秀兵至，遂遇害軍中。

○邀車駕宋

太祖幼時嘗從辛文悅受學。周顯德中太祖爲殿前都點檢久不復見。一日文悅夢邀車駕既拜乃太祖也。太祖亦夢其來謁因令左右尋之。次日文悅果自至。後累官至員外郎。

○挽車三十輛宋

潘擇可貢入京師夢挽車三十輛其弟端甫隨其後時崇寧五年也至政和三年端甫始就恩科相去已三十年乃悟挽車者三十載也。

○聲言救駕明

平都督安。帥師與靖難兵戰于汎河。安操長鎗馳馬追
文廟。幾及之。會馬蹶不克。先是。文廟夢與安戰。將敗。一
男子豐貌美髯。乘白馬持刀自西向東。聲言救駕。卽砍倒
安馬。文廟得脫。問之曰。臣莘城城隍神也。及與安戰。始
末一如夢云。

○○○武械類

○以刀開心

西漢

鄭玄師焉。融三載無聞。過樹陰下。假寐。夢一人以刀開其
心。謂曰。子可學矣。於是寤而卽返。遂洞精典籍。後東歸。融
曰。詩書禮樂皆東矣。

○刀懸于梁

東晉

王濬夢三刀懸于梁上。又益一刀。李毅賀曰。三刀。州字也。後又益一刀。明府其臨益州乎。果遷益州刺史。

○持六刀

齊

洪興祖夢持六刀。覺曰。三刀爲益。今倍之。其饒乎。已而擢知饒州。

班劍授之

陳

大通三年。徵晉安王綱入朝。未至。而昭明太子統夢與晉安王奕。以班劍授之。曰。王當有此。後昭明薨。立晉安王爲太子。

○寶刀授已 陳

陳蒨夢梁武帝以寶刀授已。及陳武帝受禪。立蒨爲臨川王。

○千牛刀 陳

初爾朱榮將與葛榮戰。夢一人從葛榮索千牛刀。榮初不肯與此人。自稱爲道武皇帝。榮乃與之。武接以授爾朱榮。榮寤而喜。果于陣擒葛榮。

巨斧鑿心 唐

賀知章少年未遇夢人持巨斧鑿其心。若剗焉。驚寤。志思開徹。遂通六經。

○大斧鑿心

唐

尹知章少勤學嘗夢神人以大斧鑿開其心以藥內之自是日益開朗盡通諸經精義未幾而諸師友北面受業焉
睿宗卽位中書令張說薦爲禮部員外郎俄轉秘書監

○刀砍我足

唐

濮州李植與弟概赴省試名將出同榻而卧概忽驚叫植問之曰夢人以刀砍我足覺猶痛楚明日放榜概預奏名後數日偶閒行有人拜于途次乃濮州軍吏云喜六郎過省某今隸名貢院昨以六郎出榜某幾遭笞撻問之何故乃曰六郎之名乃木傍旣誤書槩字爲旣下木主司大怒

然已逼出院許修改無異則免責罰遂以刀子刮其下木
幸而得免叩其修字之時乃慨夢刀斫足之頃也植嗟異
久之。

○帶劍斫桂

唐

王大臨赴試夢帶劍上樹斫桂一枝甚喜及舟次劍江以
銀盃嗽口墮之遂自取之身亦隨溺及得其尸手執桂一
枝乃知帶劍者劍江也。

○○幡幢類

○幡出指端

東晉

劉仁恭夢大幡出指端從建旄節。

○龍旂豹尾

陳

劉后十七歲時。裴方明爲子求婚。酬許已定。后夢先有迎車至。猶如家常迎法。不肯去。次有迎車至。龍旂豹尾。有異於常。后喜而從之。旣而占裴不成婚。竟嬪于帝。

○旌旗鶴雁

宋

鄭公母韓夫人有娠。夢旌旗鶴雁降其庭。云有天赦。已而生公。爲宋室賢相。

○立旗於門

明

平江士人姓潘。初名某。其母夢神人立黃旗於門上。乃易名夢旗。復自夢神曰。當用交龍爲旂之旂。遂更夢旂。是歲

登科。

○幢輶廣樂迎已

明

張秋官鳳翔舉進士。爲尚州。聲大起。一旦病疽。告休沐。夢
幢輶冉冉自天下。廣樂導之。若迎已者。及病之革也。起端
坐。索紙筆。掃詩一十八章。言意漫漶。弗次。漸昏漸竭。末詩
有一章三句者。一章一句二句者。投筆而氣絕矣。時部寮
李夢陽王崇文經紀其喪事。既以之歸。塋。夢陽復上孝廟
言。鳳翔老母。孤兒幼妻。不免凍餒溝壑。乞追繹鳳翔大馬
之微勞。體古敝帷敝蓋之義。查例。勅有司。月給米一石。養
贍。終其母妻之身。奏下。吏部准行。

○○○祭器類

○負鼎抗俎

奇

商湯思賢夢見有人負鼎抗俎對已而笑寤而占曰鼎爲和味俎爲割裁天下豈有爲吾宰者哉後伊尹負鼎俎要湯舉以爲相

○芻狗

三國

魏太史嘗問周宣曰吾昨夜夢見芻狗其占何也宣答曰君欲得美食耳有頃出行果遇豐膳後又問宣曰昨夜復夢見芻狗何也宣曰欲墮車折脚宜戒慎之果如宣言後又問宣昨夜復夢見芻狗何也宣曰君家欲失火當善護

之俄遂火起語宣曰前後之時皆未嘗夢也聊試卿耳何以皆驗耶宣對曰此神靈動君使言故與真夢無異又問宣曰三夢芻狗而其占不同何也宣曰芻狗者祭神之物故君始夢當得飲食也祭祀既訖則芻狗爲車所轆故中夢當墮車折脚也芻狗既轆之後必載以爲樵故後夢應失火也

○湯鼎負龍

宋

趙汝愚嘗夢孝宗授以湯鼎背負白龍升天後翼寧宗以素服登大寶蓋其驗也

○三鼎一卑

明

楊司徒鼎字宗器。陝之咸寧人。未第時。嘗夢三鼎。二鼎高出半空。一鼎稍卑。後公鄉試。會試俱第一。廷試第二。乃一鼎稍卑也。公名鼎。故三鼎見夢如此。

○○○樂器類

○鈞天廣樂

秦

秦繆公夢至帝所。觀鈞天廣樂。帝錫以策。秦遂昌。

○鐘磬自墜

梁

散騎常侍王茂。以元勲受鐘磬之賜。及刺江州。夢鐘磬在格。無故自墜。及覺。命奏樂。既成列。鐘磬在格。果無故編皆絕。墮地。謂長史江詮曰。此樂天子所以賜老臣也。樂既墜。

矣能無危乎。俄而病卒。

○二磬相沓

明

淮安楊淮赴秋試。祈夢于都城隍廟。夢二磬相沓。初不解。中式後授重慶府同知。始徵夢焉。

○○○印笏類

○六印加劒

宋

凌策初登第。夢人以六印加劒上遺之。其後知益州。往劒外。凡六任之。

○庭橫象笏

宋

章得象字希言。生時母夢庭橫象笏。因以得象名之。仁宗

朝作相。

○○○家伙類

○與君杖

東漢

樂安太守楊沛夢人曰八月一日曹公當至必與君杖。飲以藥酒使周宣占之。是時黃巾賊起宣對曰夫杖起弱者藥治人病八月一日賊必除滅至期賊果破。

○兩杖函打

西晉

宋榻夢內中有一人著赤衣榻手把兩杖函打之。純曰內中有人肉字也肉色赤也兩杖箸象也函打之飽肉食也。俄而果驗。

○下梯六七級明

童學憲軒於丁卯秋赴試畢夢坐梯上一級頃之有王坊
與者捧茶其前童下梯六七級取之遂坐其處及放榜則
十六十七名赴鹿鳴時李府尹敏謂言初擬予爲榜首疑
對策太詳似宿構者已落之矣及填榜過半王翰林一寧
偶取落卷視之見予名予言是小試首卷王瞿然歎曰幾
失此人遂援筆批曰三場超出衆作取之童次日領卷始
悟一級及六七級之意

○○○梳妝類

○懷明鏡

梁

劉漑子鏡母初孕夢懷明鏡因名。

○講堂照鏡 唐

崔湜附太平公主事敗配流行至荊州夢于講堂照鏡曰。鏡者明象也。吾當爲人主所明乎。以告占人張繇。繇曰。講堂者受法之所。鏡者於文爲立見金。此非吉徵。其日追使至。縊于驛中。

○梳化月 宋

金王其夢二玉梳化爲月生二女。後選入宮。長爲淑妃。次爲元妃。後相繼進位坤寧。

○○○雨具類

○○○手舉一傘明

錢御史山字靜夫。滁州人。會試畢。夜夢手舉一傘。覺而詰諸同舍友。江西臨江縣傅恕云。吾鄉曾夢舉傘者。人或占云。當中第六名也。君當應此兆。蓋傘字五人。今夢舉傘者。在五人之下。故也。迨揭曉。果符前占。至三月二日。又夢啣頭髮口內。以手取出。人占云。髮從衙門出。當在法司也。後果觀政刑部。授南臺御史。

棟宇部 樓閣 屋舍 神宇

○○○樓閣類

○登樓而歌 東漢

張負爲武威太守。其妻懷孕。夢帶印綬登樓而歌。訊之占者曰。必將生男。復臨茲邦。命終此樓。旣而生子。猛以建安中爲武威太守。殺刺史邯鄲商州兵圍之急。猛耻見擒。乃登樓自燒而死。卒如占云。

○白玉樓成

唐

李賀夢人持版告曰。天帝白玉樓成。請君爲記。寤以語其母。不久有烟氣起。賀卒。

○登閣上

宋

王邁乞夢九仙廟。夢登一閣上。設四席。邁據其首。童子謂曰。君當坐第四次。年入試。初擬首卷。移置第四。

○○○屋舍類

○求治舍宇

京口新城有鄧艾廟。毀已久。晉譙王司馬恬爲都督。夢一人自稱鄧公。求治舍宇。恬乃令修造云。

○松戶棗屋

唐

楊子系謹善占夢。一人夢松生戶前。一人夢棗生屋上。謹言松丘隴間所植。棗字重來。呼魄之象。二人俱卒。

○先進場屋

宋

有士子將赴試。夢先進場屋。譔書已訖。而其他始至。覺而語諸妻。喜曰。今秋大比之魁焉。知擢非某耶。妻曰。非也。子

不憶魯論曰先進乃第十一也。及撤關視榜果然。又有主欲擇榜首而未決。夢軍持火乃首名。輝者果符輿論。

○起屋騎梁 明

莫行人灝字景淵順天宛平人。一日在朝接本。于時御史沈義郎中史敏進士王祐等同坐午門東廊下。史問曰。莫兄向中解元時曾有吉夢否。莫曰有之。夢本家起屋。其時梁頭身掛紅帛一段。僉曰是矣。史又問曰。兄前日中進士時。豈亦有夢耶。莫曰有之。夢人授黃曆十五冊。無他也。占曰。君當中一百八十六名。莫曰然。僉問何以知之。曰。以月數耳。曆十五冊。得一百八十月三年一閏。五年再閏。積十

五年得六閨。故中一百八十六名也。諸公共嘆其夢之神。且謂占之巧。於是相顧一笑。

○○○堂院類

○第十院坐

唐

煬帝入棲鸞院。是夜天暑。院妃慶兒臥簾下。睡中驚。帝扶起問之。曰。妾夢帝握妾臂。同遊至第十院。坐殿上火燒。見帝坐烈焰中。驚呼人救。方覺。帝解曰。火有威勢。吾居中。有威也。及幸江都被弒。帝入第十院。居火中。一如夢中所見云。

○侍中堂

宋

仁宗策士時韓琦年始二十名在第二唱名至第一甲方終太史奏曰下五色雲見左右從官皆賀於殿上先是赴省進士元絳有叔同待試於都下因疾委頓久而復蘇具言夢中嘗至一官府殿閣甚嚴中有一堂榜云侍中堂俯窺堂中則列人之姓名曰趙普曰丁謂曰馮拯曰韓琦字皆黃金外以青紗覆之此事甚播于當時然韓琦猶未第但閉門爲學未嘗妄與人交人亦莫知公爲誰何及省榜出始元公姓名衆驚相謂曰此非元氏所夢者乎後公卒踐相位。

○講於陰堂之奧

明

周磐年七十三歲。會集諸生講論終日。因令其二子曰。吾日者夢見先師東里先生。與我講於陰堂之奧。既而長歎。豈吾齒之盡乎。若命終之日。桐棺足以終身。外槨足以周棺。斂形懸封。濯衣幅巾。編二尺四十簡。寫堯典一篇。并刀筆各一。置棺前。示不忘聖道。其月望日。無病忽終。學者以爲知命焉。

○○○門梁類

○門署權字

唐

程執恭領滄涼節度使。嘗夢諸門悉署權字。乃改名權。後朝廷詔鄭權代之。

○玉擲於門

李盛作安南守。夢人以玉擲于門。盛曰。閨字也。

○梁傾折

明

魯京尹崇志。字惟功。浙之天台人。父爲僉憲。嘗夢澡浴。胸
前隱隱生獬豸紋。公占之曰。大人行當居內臺矣。旣而陞
僉都御史。意謂獬豸。乃風憲花樣。不衣于外。而生于內。是
在內也。果驗。又嘗自夢做官。方視事。見吏人捧印至前。諦
視之。乃銀章也。後公位至京尹。果應銀章之夢。又夢府堂
上梁傾折。點旦語諸同寅。且曰。恐本府有不虞之憂。衆以
爲然。逾月。公病不起。士民哀之如喪父母焉。

○○○神宇類

○招提寺終爾身

宋

周朝壽任泗州。罄家資修城。貧不能堪。夢老叟謂曰。若往招提寺。可終爾身。明日往寺遇者僧。僧問姓名。鄉貫。卽請沐浴更衣。設供止宿。旦具香花迎入法堂。會衆升座曰。尊君侍郎所寄錢十萬貫。老僧被此羈留十年。謹用歸納。授以簿書。訖端坐而化。

○城隍廟門懸鄉榜

明

閻司徒本字宗元。陝之邠州人。初應正統甲子科鄉試。夜夢城隍廟門懸鄉榜。急往視之。乃見鴈鶰名第十四。詰旦

語諸同行。僉謂貔貅邊傍是兩牙字。他日官爲風憲。其兆於此乎。是年公果中鄉試。四十名。登景泰甲戌科進士。授戶部主事。似與前占不合。旣而陞郎中。五年遂有巡撫之命。始知貔貅之夢不爽矣。及休致時。成化己亥七月十五日。夜將二鼓。忽夢與莆田陳亞卿俱穿三品服色。各受勅一道。自五鳳樓出。遂寤。乃呼其子讓於榻前。以夢告之。且曰。予自休致以來。固無仕進之心。亦無仕進之夢。今夕之夢。果何謂耶。其子對曰。大人平昔居官。奉公守法。今雖休致。誠恐公道難泯。必有起復。公笑而不答。後于八月十五日。有奏事者來自京師。得通報。果起爲戶部右侍郎。

乃是七月十五日晚報也。夫以恩命方出。瞬息卽見於夢。何其神速哉。迨庚子年。陝西榆林有警。朝廷出師。命公督餉。乃與陳亞卿同行。是時受勅出朝。儼若夢中所見。况陳亞卿先於癸巳年。亦是陝西督餉者。其兆之見於夢。又無不脗合矣。

○入玄妙觀 明

丙寅九月初二日。乃吾母許太夫人誕辰。是日也。起自五鼓。覺太早。復就枕。則夢入玄妙觀。觀本無廊。夢中乃有廊。至東廊下。遇全真數人。蹣跚而來。共一人禿頂。予戲曰。此似倭奴。後一人長身廣頤。曰。予曰。吾輩八仙。子何得倭奴。

我予訴以病求療。仙笑不答。予哀懇。仙曰。我爲汝視脉。因屈予中指。而按其下云。子胸中有瘀血。不下則死。我與子藥。乃探筐中。先取一味。色如甘艸。又九子一撮。如今青州白九子然。予請曰。師仙也。今我夢中得見耳。何從取藥。曰。子無論此。當以腹中響爲驗。予問所寓。寓雷殿。卽覺。覺則中指尚痛。腹中轆轤有聲。明日與友人王君之輩同至雷殿。物色之。則皆星像。無有仙。君之謂羽士房中或供之。乃轉殿後。見湧壁塑渡海八仙。其身長廣順者。張陽子也。此後予病漸減。後乃得花木九。色白如夢中。益有驗。鳳翼自誌。

冠裳部

衮衣
衮襴

衫甲
鞋靴

巾帶

○○○衮衣類

○衮衣升御座

東晉

姚襄夢其弟服衮衣升御座。諸酋長皆侍立。覺謂將佐曰。此兒志度非常。或能大起吾族。後苻自稱秦王。

○脫上衣

東晉

索克夢見一虜。脫上衣來詣克。統曰。虜去上衣下半。男子夷狄陰類。君婦當生男。終如其言。

○綉衣曲領

宋

裴安祖嘗以天熱。舍于樹下。有鵲。乃逐雉。雉惡投之。遂解。

樹而死。安祖乃取置陰地，護視良久，得蘇飛去。後夢一丈夫衣冠甚偉，着綉衣，曲領向安祖再拜。安祖怪問之，答曰：「感君前日見救，故來謝德。」

○着袞倚槐

齊

廣陽王元淵夢着袞衣倚槐樹，問楊元璵。元璵言：「當得三公。」退語人曰：「死後得三公耳。」槐字木傍，鬼不久果爲朱榮所殺，贈司徒。

○着朱衣行水上

齊

鮑泉之爲南討都督也，其友人夢泉得罪于世祖而告之。未旬，世祖遣王僧辦代泉辦，至乃背泉而坐，曰：「鮑郎有罪。」

令旨使我鎖卿。因出令示衆鎖之牀下。頃之其友人乃夢泉着朱衣行水上。因告泉曰。勿憂。尋得免矣。因說其夢。泉密記之。俄復見任。

○兵着緋禪

唐

玄宗夢入井。有一兵士着緋禪。背負而出。明日使于兵號中尋訪。無此人。又於苑中搜訪。見一掌闢者。緋禪便引見上。問汝昨夜作何夢。對曰。夢從井中背負日出。登上觀其形狀。與夢相似。乃問汝欲官乎。答曰。臣不解作官。臣家貧。遂勅賜錢五百千。

○着緋乘驢

唐

張鷟初爲岐王屬夜夢着緋乘驢夢中自怪我衣綠乘馬
無爲衣緋却成驢其年應舉及第授鴻臚丞未經考而授
五品此夢始應。

○青衣女子

唐

趙文若病亡經七日家人欲歛忽縮一脚遂停旣甦云被
一人來追卽隨行人一宮城見王戒以猪羊充飽從此不
食肉後因公事至驛忽夢一青衣女子求哀因問驛吏曰
有何物食報云見備一羊甚肥嫩詰之乃青犢也文若曰
我不吃肉遂不令殺

○白衣人助知慧

宋

許知可嘗獲鄉薦省闈不利而歸舟次平望夜夢白衣人曰汝無陰德所以不第知可曰某家貧無貲何以與人白衣曰何不學醫吾助汝知慧知可輒寤歸踐其言果得盧扁之妙凡有病者無問貴賤診候與藥不受其直所活不可勝計後又艤舟平望復夢前白衣人相見以詩遺之曰施藥功大陳樓間處殿上呼盧喚六作五思之不悟其意姑記于牘紹興壬子以第六人登科因上名不祿遂升第五其上則陳祖言其下則樓材也皆前夢也

○白衣女子

宋

夏駕里民羅滿于水中獲一石觀音供于家僧守齋停舟

于此夢白衣女子曰我舟覆父與夫皆溺死幸容我守齋拒之女曰假一篋宿何傷守齋開篋納之遂驚寤迄旦至羅氏見石觀音如初出水守齋默念與夢相合因乞以歸

○錦衣貼月飛

宋

沈彬字子文舉進士時夢着錦衣貼月飛人謂身不入月宮必不第果然後爲吏部郎中

○衣冠高古

宋

王元規慶曆末將赴吏部選一夕夢一人衣冠高古若術士者因訪以當授何地官職早晚其人書八字與之云時生一陽體合三水旣覺莫曉其意及注官果授河南府河

清縣主簿凡三字從水到官日正冬至。

○求衣 宋

篆衣真人何中立逝前兩日太皇太后夢何來求衣亟持賜之至巳卒遂易之以瘞焉。

○○○衫甲類

○金甲執槊 唐

至德二年十月二十三日豐樂里開業寺闍人宿門下夢一人長二丈餘被金甲執槊立于寺門外俄而以手曳其門扇鏽盡解神人卽俛而入寺行至佛殿顧望而沒闍人驚寤及曉視其門已開矣卽其以夢白于寺僧寺僧共視

見神人足跡甚長遂告於京兆京兆以聞肅宗命中使驗之如其言

○披甲者數百

宋

曹魯公放生以蜆蛤之類以爲人所不放而活物之命多也一日夢披甲者數百人前訴既寤而問其家乃有惠蛤蜊數筐者卽遣人放之夜復夢披甲者來謝

○紫衫人

明

銓部雲南談公正未第時游學四川館于巨族其主翁夢着紫衫人引至一第碧瓦琉璃朱楹彫棟如帝王居中有一扁大書天曹字見談公穿藍繡袍束犀角帶面南坐而

冠則如吏帽無二。左右擁簿書列行橫侍。王見驚趨出。聞內大聲曰。我東道去。可傳語之。其子亦貴人也。毋洩須臾。前紫衫人追至。語如所傳。遂覺不數年。公以春秋登二甲進士。任司理。入諫垣。遷南岡卿。巡撫江右。今官吏部右侍郎。王翁子嚴望亦舉進士。今任應天武學教授。嚴與予交厚。故知其詳云。

○○○巾帶類

○巾帶備具 宋

陳元植初有家道。而好行陰隲。至於禽獸亦蒙其惠。每將食於高原之上。百鳥逢見。必飛鳴前後。或來逼其坐隅。元

植甚憫之。禽鳥亦不畏懼。一夕夢有綠衣人長三尺餘。巾帶備具。謂元植曰。爾甚有陰德。及物然。爾將來壽命短促。以此物來延爾壽。汝宜勉之。覺後飲食加增于常時。年九十九歲。一旦袖有一物投地。化爲著緋衣人。拱立于前曰。君壽本不逾四十。爲有陰功。是以延爾之壽。今近百歲。須歸常理。條然不見。元植遂與子孫述之。令選地封墓。未幾卒。

○吏巾一頂明

章都憲鳴鳳爲刑部主事時。嘗夢於日中行。見頭上吏巾一頂。覺而異之。後數日。公陞員外郎。所懸牙牌爲緋鬚遮。

夢林玄解 卷三十三
蓋員字止露外郎二字始悟吏巾之夢

○○○衾褥類

○褥席見賜 齊

柳慶遠從兄世隆曰吾昔夢太尉以褥席見賜吾遂亞台司適又夢以吾褥席與汝汝必光我門族慶遠果開府

○覆錦衾 宋

朱長文母周夫人有娠夢覆錦衾說者曰是生子必能文矣已而生長文十歲能屬詞十九擢乙科進士第既冠授秘書省校書郎

○鞋靴類

○使玉脫鞋

唐

隴西李益初與鄭縣霍玉締好誓不改娶已而以母命再婚長安盧氏玉微聞之雖怨益尚期一相見益既歸鄭縣自慚渝盟絕不與玉相聞時玉既病矣一夕夢黃衫丈夫抱益來至席使玉脫鞋玉卽驚寤以告其母因自解曰鞋者諧也脫者解也既合而解亦當永訣繇此占之必遂相見相見之後當死矣明日果有黃衫丈夫挈益至益豪士恨益之薄行故兼以酒肴與二人合歡也二人既相見玉引左手握生臂擲杯于地長慟數聲而絕

○韞笏與之

宋

松陵陳益少有俊林領鄉薦嘗夢一人衣道服促左右於巾笥中取綠衣靴笏與之益詢左右則曰楊文公也益穿袍覺毛骨寒凜似不能勝者歎曰惜乎有此才而無此綠卽命襪去益後不一年卒

飲食部

五穀
藥劑

酒
羹

五穀類

西籬下有粟

東晉

劉殷字長盛新興人也七歲喪父哀毀過禮比長同妻張氏事曾祖母以孝聞殷嘗夢人謂之曰西籬下有粟寤而掘之得粟十五鍾銘曰七年粟百石以賜孝子劉殷自是

食之七歲方盡及王氏卒夫婦哀毀幾至滅性後有二白鳩巢其庭樹自是名譽彌顯太傅楊駿表其行於朝勅有司供其衣食蠲其徭賦賜帛二百疋穀五百斛後拜新寧太守

兩甌麻粥

齊

齊陳皇后生高帝帝二歲時乳人乏乳后夢人以兩甌麻粥與之覺而有乳

煮小麥漬之

唐

李禮之與妻鄭氏相重妻先亡遺言終不獨死未幾禮之脚上發腫夢妻云煮小麥漬之卽愈旣寢如其言而治之

反割甚而卒

○篩紅豆成人

宋

乾德中金陵城破或夢一女子以巨篩篩落紅豆成人須臾一貴人盛冠服墮地云徐舍人也既寤聞徐錯死

○食麻糍

宋

太學生葉文鳳年十八登進士官天台赴任途遇生辰午睡夢食麻糍覺聞鄰姬哭因扣之言今日亡兒生辰期以麻糍祭葉又詳問姬曰兒陳希曾以詩亞薦尚存稿在葉求閱卽及第之作無一字差舛是知前生子遂携之赴官

焉

○支米 明

張少卿守規四明人會試畢夢入倉廩間支米其吏人唱至七十二人纔到其名迨揭曉果中七十二名

○○○酒羹類

○縱酒密會 唐

唐開元中宮禁有美人忽夜夢被人邀去縱酒密會極歡而歸歸輒流汗倦怠後因從容奏於帝帝曰此必術士所爲也汝若復往但隨宜以物識之其夕熟寐飄然又往美人半醉見石硯在前乃密印手文於曲房屏風之上寤而啓帝乃潛以物色令於諸宮觀中求之果於東明觀得其

屏風手文尚在。所居道士已遁矣。

○玉筋食羹

明

邵康節母李氏夢神人令以玉筋食羹一杯。告曰：當生佳兒。後李夫人因山行，見雲霞間大黑猿有感而孕。臨蓐，慈母滿庭，人以為瑞。是生康節。七歲戲於庭，蟻穴中別見一孔，雲氣往來。

○○○藥劑類

○憐孝賜仙藥

梁

夏侯詵字長況，寧陵人也。母疾屢經危困，詵夜不解帶者二年。母憐其辛苦，令出便，詵方假寐，忽夢其父告之。

曰汝母病深痼非凡藥可愈上帝憐汝至孝賜以仙藥在
居後桑樹枝上訢忽起如所言得藥進之母病頓瘥

○授丸一柵

梁

隱士何點少患渴痢不愈後在石佛寺講所晝夢一道人
形貌非常授丸一柵夢中服之自此而差

人投藥

陳

王頌僧辦子也從韓擒虎伐陳被傷不堪復鬪嗚咽自悲
夜睡夢有人投藥比寤而創不痛陳滅後竟發霸先塚報
父讎云

○牛黃金虎丹

宋

趙子固母劉左足面一瘡下連大指上連外踝痛楚殆不可忍而百藥不驗如是二十餘年病轉劇一夕趙夢四神僧坐一室中趙亦坐因而發嘆一僧問故趙以實告僧曰可食牛黃金虎丹既覺驚異試取藥半粒服之良久腹大痛舉家且悔俄而下礪塊物如鐵石者數升是夕瘡但微癢而無血數日成疔遂愈蓋誠孝所感云

乳香飲方

宋

吳大嘗以泥補葺善神後因結屋墜梯折傷腰勢殊亟夢神來云汝嘗救我我不敢忘授以乳香飲方覺而能記卽喚子買藥服之一旬而愈

○服天南星

宋

張汝明至孝居喪飯粟脫飲水無醯鹽艸木之滋浸病歲行輒踏夢父授以服天南星法用之驗人以爲孝感云。

蕃彙部

植木 瓜菓

草花 紫葍

○植木類

三槐之間

春秋

孔子夜夢三槐之間豐沛之祁有赤烟起驅車對楚西北觀之見芻兒敵鹿傷其左足薪而覆之

○梓樹數株

東漢

武帝幸平陽公主家幸衛子夫遂納于宮中歲餘不得見

子夫請出上曰吾昨夜夢子夫中庭生梓樹數株豈天意乎是日幸之有娠生女凡三幸生二女一男男卽戾太子也

○松生腹上 三國

丁固嘗夢松生其腹上謂人曰松乃十八公也後十八歲吾其爲公乎卒如所夢

○柳樹仆地 唐

柳宗元自永州司馬徵至京師意望錄用一日詣卜者問命且告以夢曰予柳姓也昨夢柳樹仆地其不祥乎卜者曰然言但憂遠官耳蓋生則柳樹仆則柳木木者牧也君

其牧柳州乎卒如其言

○楓生腹上

唐

張志和母夢楓生腹上而產志和志和後入仙班

○側栢葵花

唐

光化中劉道濟止天台山夢一女子引入牕下有側栢葵花無何前至奉化縣古寺見有一牕側栢葵花宛如夢中所見問之寺僧云有一客官女甚美至此中心疾而死蓋道濟所夢乃此女之魂也

紅杏三十餘顆

明

丁太守鏞字鳳儀應天上元人赴京會試舟經呂梁河下

夜夢神人衣冠甚偉。頎然幾三丈餘。丁見之。將欲退避。神
即詣前揖曰。吾河神也。下曰。汝神必知吾來春科申之事。
神曰。大吉。既而以紅杏三十餘顆與之。覺而語諸同行僉
以爲杏園之祥。明年春榜果中三十一名。

○○○草花類

○校馬蘭齊

朱兆謀入洛。夢登一高堆。拔馬蘭。手至無不盡出。故兆
謂必尅馬蘭管屬。可爲席者也。

○摘紫薇花唐

齊澣未任時。寓居京邸。鬱鬱不自慊。嘗夢游禁中。見一王

者澣懼趨拜如人臣禮。頃之王者傳呼內侍摘紫薇花一大枝擲澣前曰可將去。澣復拜如謝賜禮。遂憤而出無寤。不知所解。未幾登第。以應制詩稱旨。玄宗悅。授紫微舍人。召見內庭。一如夢中。而帝貌亦肖王者。始知夢不妄云。

紺蓮花

宋

馮元七歲時讀易。其母夜夢異人以紺蓮花與元。吞之。且曰善讀此。後必貴顯。元果登進士第。歷官戶部尚書。迨老。率三日一誦易云。

持三花

明

胡忠安公淡宇源潔。常州武進人。生之夕。母夢持三花者。

以一遺之覺而生公居數日有僧自吳來訪公家見徐夫人問曰近見何祥瑞夫人無以應但新婦生孫差穎異耳僧因索視之比見公微有咲容問之則曰吾師天池高僧既老圓寂後嘗示夢我今生某家後當顯爾宜來我以一紙爲記今果然聞者咸以爲異七歲知讀書不習嬉戲事止異人如老成人後登洪武庚辰進士累官至太子太保禮部尚書學行事業蔚爲一代名臣雖愚夫孺子皆知爲長者也

芝產門楣

明

王文安公禕字子克浙之義烏人大父石峽書院山長一

夕夢五色芝產門楣翼日公生識者以爲文章之兆公幼秀爽敏惠稍長師事黃文獻公潛隱青巖山中著書立言

○花一枝 明

潘二守珩字仲玉應天上元人鄉試畢其妻夢有人挑二盒至其家開視一盒乃花一枝紅帛一段留而去之因問彼一盒花紅送與何處其人曰送胡璟家其年二人俱中鄉榜

○○○瓜菓類

○人與瓜

宋瓊母病冬月思瓜瓊夢見人與瓜竟得之手中時稱孝

感云。

○櫻桃一盤明

宣宗皇帝夢以櫻桃一盤賜夏忠靖公二子。其長者玠退避不敢受。仲子瑄受之。後玠早卒。帝曰。繼夏氏者必此子也。逮忠靖公卽世時。瑄年十三。上特命爲尚寶司丞。累官至南京太常寺少卿。掌尚寶司事。蓋櫻桃果品之貴者。尚寶貴品。夢不誣也。

○○○柴薪類

○木上破天

東晉

敦謀逆。夢將一木上破天。許真君曰。此是未字。未可動。

耳。一日明帝微行。察敦營壘。敦正晝寢。夢日環其城。驚寤。曰。此必黃鬚鮮卑兒來耶。帝母鮮卑出也。亟遣人追之。不及。

○欠柴一千七百束

唐

韋正貫應舉時。嘗至汝州。刺史柳凌留署軍事判官。柳嘗夢有一人呈案。中言欠柴一千七百束。因訪韋占之。韋曰。柴薪木也。公得非不久乎。月餘。柳卒。素貧。韋爲部署米麥。鏹帛金。前請於官數月矣。唯官中欠柴一千七百束。韋披案。方省柳前夢。

夢林玄解卷之三十三

終